

ՀԱՅ ԵՐԵՒԱՆԵՐԻ ԹՐՔԱՑՄԱՆ ԳՈՐԾԸՆԹԱՑՆ ՕՍՄԱՆՅԱՆ ԿԱՅՍՐՈՒԹՅԱՆ ՊԵՏԱԿԱՆ ՈՐԲԱՆՈՑՆԵՐՈՒՄ (1915 -1918 ԹԹ.)

Նարինե Մարգարյան

ա. Թրքացման քաղաքականության իրականացումն օրենքների, հրամանների ու հեռագրերի շրջանակներում

Հայոց ցեղասպանության իրագործման ընթացքում երեխաներն ամենախոցելի խումբն էին: Ջանգվածային կոտորածների ու գաղթի ժամանակ նրանք ենթարկվում էին բազմակողմանի բռնաճնշումների: Տարագրության ճանապարհից, ծանր կորուստներից հետո նրանք անընդհատ բախվում էին նորանոր դժվարությունների՝ փորձելով հաղթահարել վերապրելու խնդիրը:

Հայոց ցեղասպանության իրագործման ընթացքում թրքացման ու ձուլման քաղաքականությունը եղել է կարևոր բաղադրիչ մաս: Այդ են վկայում օսմանյան փաստաթղթերը, որտեղ պարզորոշ երևում է, որ թուրքական կառավարությունը նպատակ է դրել հայ երեխաներին համակարգված ձուլելու մուսուլմանական հասարակությանը: Երեխաները՝ որպես ազգի անբաժանելի հատված, նույնպես ցեղասպանության զոհ են դառնում¹: Նրանք նաև բռնի կրոնափոխության առավել դյուրին հատվածն են. նրանց իսլամացման գործընթացը, ազգային ու կրոնական ինքնագիտակցության մոռացությունն առավել վաղ հասակում ավելի դյուրին է իրականացնել: Հենց այս քաղաքականությունն ու տրամաբանությունն էլ ընտրել էր երիտթուրքական կառավարությունը: Վերջինս նպատակ էր դրել իր հսկողության տակ գտնվող որբանոցներում «ազգափոխ» անելու այդ երեխաներին ու ծառայեցնելու թուրք ազգի շահերին, չնայած միշտ էլ մտավախություն է ունեցել, որ այդ երեխաներն այդ կերպ փրկվելով, հետագայում վրեժխնդիր կլինեն: Հայտնի ցեղասպանագետ Վահագն Դադրյանը, անդրադառնալով Հայոց ցեղասպանության տարիներին հայ երեխաների բռնի իսլամացման խնդիրներին, իրավացիորեն նշում է, որ թուրքերը գնահատում էին հայ երեխաների գենոֆոնդը՝ նրանց դիտարկելով որպես թուրք ազգի գենային նկարագիրը հարստացնելու անգնահատելի աղբյուր²:

Հայոց ցեղասպանության տարիներին իսլամացումը դիտարկվել է միաժամանակ և՛ նախապայման, և՛ հետևանք: Չնայած այն, ինչպես թուրքական կողմն էր հավաստիացնում, նախապայման էր նրանց փրկության համար, սակայն այդ գործընթացը հեռու էր փրկություն կոչվելուց: Հետևանքն էլ այն էր, որ նրանք իսլամ ընդունելուն զուգահեռ, փոխում էին իրենց մայրենի լեզուն, մշակույթը, նույնիսկ անձնանունները: Դանիացի պատմաբան, ցեղասպանագետ Մաթիաս Բյորնլունդը

¹ St' u Dadrian V., *Children as Victims of Genocide: The Armenian Case*, The Issues of The History and Historiography of The Armenian Genocide, Հայոց ցեղասպանության պատմության և պատմագրության հարցեր, № 7, Երևան, ՀՅԹԻ, 2003, էջ 3:

² Նույն տեղում, էջ 4:

հայերի ձուլման խնդիրներին անդրադառնալիս եզրակացնում է, որ կրոնի, լեզվի, մշակույթի, անգամ անձնանունների հարցում մուսուլման ընտանիքներում, կառավարական որքանոցներում ու հասարակական ոլորտներում իրականացվող համակարգված ճնշումների հետևանքով մնում էր միայն սիստեմատիկ թրքացման պատրաստ կենսաբանական «հում նյութը»³: Այս պարագայում մարդը ֆիզիկապես չի վերանում, բայց նա այլևս չի կարող ապրել որպես տվյալ ազգի ներկայացուցիչ:

Հայ երեխաների բռնի իսլամացումը կատարվել է երկու մակարդակով՝ պետության և հասարակության լայն զանգվածների կողմից: Բազմաթիվ հայ երեխաների թուրքերն ու քրդերն առևանգում էին, երբեմն՝ «որդեգրում», ու նրանք, աստիճանաբար իսլամական միջավայրում ապրելով, թրքանում ու ձուլվում էին այդ հասարակությանը: Հաճախ հայ երեխաներին կառավարության հրամանով հանձնում էին այնպիսի գյուղերի ու մարզերի թուրք բնակիչների, որտեղ հայեր ու օտարներ չէին գտնվում⁴:

Պետական մակարդակով իսլամացնելու համար հիմք են ծառայել պաշտոնական հրամաններն ու հեռագրերը: Այստեղ տեղահանությունների ու բնաջնջման ողջ ընթացքում հայ երեխաների համար օգտագործվել է “*bakim ve tarbiye*” թարգմանաբար «խնամք ու դաստիարակություն» արտահայտությունը:

1915թ. նոյեմբերի 16-ի ներքին գործերի նախարարության անվտանգության ընդհանուր վարչության ծածկագրված հեռագրում՝ ուղղված Հալեպի ու Դամասկոսի նահանգապետարաններին, պահանջվում է. «Եթե... նահանգներում կան երեխաներ, ովքեր ոչ ոք չունեն, կրթության և դաստիարակության համար նրանց ուղարկել Ստամբուլ»⁵: 1915 թ. դեկտեմբերի 12-ին Հալեպի կուսակալությանն է ուղղվել *ներքին գործերի նախարար* Թալեաթի հետևյալ հեռագիրը. «Հառաքեցեք եւ սնուցեք այն որբերը միայն որոնք չեն կրնար յիշել զուլումը, որուն ենթարկուեցան իրենց ծնողները»⁶:

1915 թ. դեկտեմբերի 30-ի՝ Նիդդեի գալառ ուղարկած իր հեռագրում Թալեաթը նշել է. «Անհրաժեշտ է, որ օգնություն տրամադրվի բոլոր նրանց, ովքեր մնացել են առանց խնամակալների ու առանց ողջ մնացած ազգականների. երեխաները տեղավորվեն որքանոցներում ու մուսուլմանական գյուղերում, որտեղ հայեր կամ օտարերկրացիներ չկան»⁷:

Օսմանյան կառավարությունը, չնայած պատերազմական վիճակին, իր նախաձեռնությամբ հայ որբերին հավաքում էր թուրքական որքանոցներում՝ իսլամացնելու ու թրքացնելու նպատակով: Այդ են վկայում ռազմական նախարար Էնվե-

³ Bjørnlund M., “A Fate Worse Than Dying”: Sexual Violence during the Armenian Genocide, տե՛ս https://he.palgrave.com/resources/sample-chapters/9780230542532_sample.pdf, էջ 37:

⁴ Stü Akçam T., *The Young Turks’ Crime Against Humanity: The Armenian Genocide and Ethnic Cleansing in the Ottoman Empire*, Princeton University Press, 2012, էջ 317:

⁵ Նույն տեղում, էջ 322:

⁶ Աստոնյան Ա., *Մեծ ճգնաժամ*, Երևան, «Արևիկ», 1990, էջ 187:

⁷ Akçam T., *նշվ.* աշխ., էջ 320:

րի՝ Թալեաթին ուղղված գրությունները, որտեղ հստակ ցուցումներ են տրվել հայ որբերին հասկապես թուրքական որբանոցներ ուղարկելու մասին:

Էնվերի՝ ներքին գործերի նախարարությանն ուղղված 1916 թ. մայիսի 9-ի գրության մեջ նշվում է. «Կրոնափոխ և ոչ կրոնափոխ հայ որբերին, եթե վերցնենք մեր որբանոցները, ես պատրաստ եմ ռազմական բյուջեից հոգալու դրա համար անհրաժեշտ ծախսերը»⁸:

Հայոց ցեղասպանության իրագործման համար կարևոր փաստաթուղթ է ներքին գործերի նախարարության ցեղային և ներգաղթային հարցերի կարգավորման վարչության՝ 1916թ. ապրիլի 30-ին գրեթե բոլոր նահանգներ ուղարկված հեռագիրը, որի երրորդ և չորրորդ կետերը վերաբերում էին մինչև 12 տարեկան երեխաներին⁹:

Պետական շրջանակներում հայ երեխաներին թուրքական որբանոցներ վերցնելու շահագրգռվածությունը պայմանավորված էր նրանց իսլամացնելու և ձուլելու ցանկությամբ, քանի որ այդ տարիներին Օսմանյան կայսրության տարածքում գործում էին եվրոպական, ամերիկյան, միսիոներական որբանոցներ ևս:

Փաստորեն թուրքական կառավարությունը պետական հրամանների ու հեռագրերի միջոցով իրականացնում է հայ որբերի ձուլման հարցը: Երիտթուրք ղեկավարները, ինչքան աշխարհիկ, նույնքան էլ աթեիստ լինելով, հավատում էին, որ թրքացումը կարող է կառուցվել միայն իսլամացման հիմքի վրա¹⁰: Այս գործընթացը կատարվում էր փուլերով, համակարգված ու աստիճանաբար, որտեղ ներգրավված էին թուրք հասարակության բոլոր շերտերը:

բ. Հայ որբերի թրքացման քաղաքականությունը պետական որբանոցներում

Թուրքական որբանոցներ են բացվել Մերդինում, Ուրֆայում, Դիարբեքիրում, Կեսաբիայում, Հալեպում, Բեյրութում, Անթուրայում և մի շարք այլ բնակավայրերում¹¹: Հիմնական նպատակը թրքացումն էր, որը գրեթե բոլոր տեղերում իրագործվել է բռնությամբ, անվանափոխությամբ, մայրենի լեզվի արգելմամբ, կրոնափոխությամբ և մի շարք այլ ապօրինություններով, որոնց մասին կխոսվի արդեն յուրաքանչյուր որբանոցի պատմության շրջանակում:

Կառավարությունը թուրքական որբանոցներ բացելու գործընթացը սկսել է Հալեպից: 1915 թ. աշնանը որբերին հավաքել են քաղաքի արվարձաններից, փողոցներից, բայց ինչպես նշում է Ա. Անտոնյանը, դա ոչ թե գթասրտության, այլ վարա-

⁸ Մելքոնյան Ռ., *Հայերի բռնի իսլամացումը ցեղասպանության փառիներին. ընթացքը և հետևանքները*, Երևան, 2010, հեղինակային հրատարակություն, էջ 29:

⁹ Հեռագրի երրորդ կետում նշվում է, որ մինչև 12 տարեկան երեխաներին բաշխեն տեղական որբանոցներում ու կացարաններում, իսկ չորրորդ կետով կարգադրվում է, որ բավարար չափով որբանոցներ չլինելու պարագայում, տեղական սովորույթների համաձայն, երեխաների դաստիարակության և ձուլման նպատակով նրանց հանձնեն մուսուլմաններին (հեռագրի տեքստն ամբողջությամբ տե՛ս Akçam T., *նշվ. աշխ.*, էջ 323):

¹⁰ Björnlund M., “A Fate Worse Than Dying”: Sexual Violence during the Armenian Genocide..., էջ 37:

¹¹ Եղիայեան Բ., *Ճամանակակից պատմություն Կաթողիկոսութեան Հայոց Կիլիկիոյ 1914-1972*, Անթիլիաս, Կաթողիկոսութեան Հայոց Մեծի Տանն Կիլիկիոյ, 1975, էջ 97:

կիչ հիվանդությունները, մասնավորապես տիֆը քաղաքում կանխելու համար էր: Սակայն կառավարությունը մտավախություն ուներ, որ այսկերպ որբերը կարող են փրկվել, ուստի Հալեայի կուսակալություն է հասել Թալեաթի հետևյալ հրամանը. «Այս տեսակ որբանոցի մը պետք չկայ: ... Դրկեցէք անապատները եւ իմացուցէք»¹²: Նոյեմբերի 26-ին Հալեայի գաղթականների ընդհանուր տեսչի փոխանորդ Աբդուլ-լահատ Նուրին հեռագրում է Կ. Պոլիս. «Որբանոցին մէջ աւելի քան 400 տղաք կը գտնուին. ասոնք ալ կարավաններուն ընկերացնելով իրենց տարագրության վայրերը պիտի դրկուին»¹³:

Սակայն Հալեայի իշխանություններն «ահավոր պատուհաս» էին գտել այդ երեխաների համար՝ որբանոցի տեսուչ նշանակելով Նազմիին, ով «սիւթէմաթիք անգթութեամբ մը, անօթութեամբ ու չարչարանքներով, կը սպաննէր որբերը նոյն իսկ քաղքին մէջ»¹⁴: Անգլիացիների՝ Հալեայ մտնելուց հետո հայոց առաջնորդարանի բողոքների հիման վրա նա ձերբակալվում է: Հարցաքննության ընթացքում պարզ է դառնում, որ իր պաշտոնավարության ժամանակ որբանոց են տարվել 3000 որբեր, որոնցից ողջ էին մնացել միայն 50-ը: Այդ կապակցությամբ Նազմիին հայտարարել է, որ դիտմամբ է արել, «որպէս զի այս շենքը արդարացնէ իր որբանոց անունը ... ու մանաւանդ, ինք շարունակէ ստանալ իր տեսչի ամսականն ու պարէնը»¹⁵:

Գերմանացի հասարակական գործիչ, միսիոներ Յո. Լեփսիուսն իր «Գերմանիան ու Հայաստանը 1914-1918 թթ.» գրքում անդրադառնում է թուրքական որբանոցների խնդրին՝ գրելով. «Հալեայում մի գերմանական որբանոց թողեցին ... մնացած որբանոցների մասին հոգ էին տանում գերմանական բուժքույրերը, որոնք վերահսկվում էին թուրքական կառավարության կողմից, հետագայում նույնպես աքսորվեցին: Որբանոցի հայ երեխաներին տեղաբաշխեցին Դամասկոսի, Կոնիայի, Իզմիրի և այլ մուսուլմանական «կառավարական որբանոցներում», որտեղ նրանք կրում էին մահմեդական անուններ և դաստիարակվում միայն մահմեդական վարքով»¹⁶:

1916թ. հունվարի 23-ի հեռագրում կրկնվում է 1915թ. դեկտեմբերի 12-ի պահանջը՝ «... (հայոց) պզտիկներուն սնուցման համար աւելորդ ծախքեր ընելը յարմար չէ: Ատոնք տարագրութեան կարաւաններուն ընկերացնելով, վիլայէթէն դուրս հանել եւ մինչ հիմայ սնուցուողներն ալ՝ մեր վերջին գելուցման համեմատ՝ Սվազ դրկել»¹⁷:

Թուրքական կողմը սկսում է Հալեայի մի շարք որբանոցների, մասնավորապես Հայոց առաջնորդարանի որբանոցի երեխաներին կենտրոնացնել Մեքքե-նեում՝ Սեբաստիա ուղարկելու նպատակով: Իր քաղաքականությունն իրագործելու համար կառավարությունն ընտրել էր Սեբաստիան ու Կոնիան: Հալեայում հայ գաղթականների տեղահանության տեսչության գլխավոր քարտուղար Նայիմ բեյն

¹² Անտոնյան Ա., *նշվ. աշխ.*, էջ 183:

¹³ Նույն տեղում, էջ 183-185:

¹⁴ Նույն տեղում, էջ 185:

¹⁵ Նույն տեղում:

¹⁶ *Deutschland und Armenia 1914-1918...*, էջ XL:

¹⁷ Անտոնյան Ա., *նշվ. աշխ.*, էջ 189:

այս կապակցությամբ գրում է. «Որքերը Սվազ դրկելու նպատակը զանոնք սպանելն էր»¹⁸: Սակայն հետագայում որոշումը փոխվում է, ու նրանց հիմնականում ուղարկում են Կ. Պոլսի թուրքական որբանոցներ: 1916թ. օգոստոսի 29-ին Հալեպում Գերմանիայի հյուպատոսն ամփոփել է շվեյցարական, ամերիկյան ու գերմանական լուծարված որբանոցների՝ 800-ի հասնող որբերի ճակատագիրը: Տեղական կառավարությունը հատուկ հանձնակատար է նշանակել այս որբանոցների համար, որը պետք է իրականացներ նրանց փոխանցումը Թուրքիայի կառավարմանը¹⁹:

1916 թ. սեպտեմբերի 5-ին Հալեպի հյուպատոսարանից տեղեկացնում են Դեր-Ջորում տեղակայված որբ երեխաների վերաբերյալ. «Ջոհլված աքսորյալ երեխաների խնդիրը մինչ օրս չի լուծվել: Տեղի աքսորման հանձնաժողովի ներկայացուցիչը ղեկավարող բուժքրոջ հետ հայտարարեց, որ այս որբերը գնալու են Կոնիայի ազգային որբանոց. այնտեղ նրանք կկրեն թուրքական անուններ և կդաստիարակվեն թուրքական ոգով»²⁰:

1917 թ. փետրվարի 14-ին Հալեպում Գերմանիայի հյուպատոս Ռյուլերը գրում է Բեռլին՝ Ռայխկանցլերին. «Հալեպի կառավարությունը Ջեմալ փաշայի հրամանով բուժքույր Բեատրիս Ռոհների որբանոցից 70 տղա վերցրեց, որպեսզի նրանց Լիբանանի կառավարական որբանոցը տեղափոխի, որտեղ նրանք Արևելյան Անատոլիայից եկած փախստական մահմեդական երեխաների հետ պետք է դաստիարակվեն: Հետագայում նմանատիպ բաշխումներ որբանոցներում հաշվի կառնեն: Այսպիսով, նման եղանակով հայերը կդառնան հայրենասեր օսմաններ, և ինչպես բացահայտ, այնպես էլ ծածուկ կերպով նախադրյալներ են ստեղծվում մահմեդականներ դառնալու: Կառավարական որբանոցներ գնացող բազմաթիվ հայ տղաներ հավանաբար կփախչեն, մնացածին էլ եթե իսլամ չընդունեն, փողոց կնետեն: Շատ քչերն այնտեղ կմեծանան»²¹: Որպես այս գործողությունների հետևանք՝ հյուպատոսը եզրակացնում է. «Կառավարական որբանոցներում երեխաների նպատակադրված բաշխումը ոչ մի դրական արդյունքի չհանգեցրեց, միայն հայ որբ տղաների թիվը դարձյալ նվազեց»²²:

Շվեյցարացի միսիոներ Յակոբ Կյունցլերը Ուրֆայում կառավարության կողմից որբանոցի հիմնումը բնորոշում է որպես թուրքական «գլխարտության» դրսևո-

¹⁸ Նույն տեղում, էջ 190:

¹⁹ Կայսերական հյուպատոսարանի աշխատակից Հոֆմանը Հալեպից հաղորդում է Կ. Պոլսի գերմանական դեսպանությանը, որ հայ երեխաների համար կիրառվելու են հետևյալ սկզբունքները. 13-ից բարձր տարիքի տղաները հեռացվելու էին, 13-ից բարձր տարիք ունեցող աղջիկներն ամուսնանալու էին մուսուլմանների հետ, 10-12 տարեկան երեխաները, ովքեր դեռ իրենց հետ կատարվածի տպավորությունների տակ էին, պետք է թուրքական որբանոցներում որևէ արհեստ սովորեին, իսկ 10 տարեկանից ցածր տարիք ունեցող երեխաներն էլ պետք է մեծանային հատուկ որբանոցներում (տե՛ս *Deutschland und Armenia 1914-1918, Sammlung diplomatischer Aktentücke, herausgegeben und eingeleitet von Dr. Johannes Lepsius*, Donnat Temmen Verlag, Bremen, 1986, էջ 290-291):

²⁰ Նույն տեղում, էջ 293:

²¹ Նույն տեղում, էջ 319:

²² Նույն տեղում:

րում: «Երբ ճամբարներում, որտեղ կուտակվել էին հայ երեխաներ, անհամար ծնողագուրկ երեխաներ լաց էին լինում ու ճչում, կառավարությունը որոշեց բացել մի թուրքական որբանոց»²³: Ճամբարներից, փողոցներից վերցրել են մոտ հազար երեխա: Խնամակալուհիներ են եղել հայերը, քանի որ թուրք կանայք հրաժարվել են: Հավաքել են նաև ծծկեր երեխաներին, և քանի որ նրանց համար պետք էին նաև ստնտուներ, որոշ ուրֆացի կանայք հնարավորություն են ունեցել քաղաքում մնալու: Կյունցլերի տեղեկությունների համաձայն՝ այս որբանոցում մահացության թիվը շատ բարձր է եղել: Կես տարվա ընթացքում 1000 որբերից կենդանի էր մնացել միայն 200-ը: Կառավարության ցուցումով այդտեղ նույնպես երեխաներին իսլամական անուններ են տրվել, համեմատաբար մեծ տարիքի երեխաներին էլ իսլամ են ուսուցանել: 1917-1918 թթ. ձմռանը շատ երեխաներ հեռացվել են որբանոցից: Միայն նա, ով հույս էր ներշնչում, որ հետագայում լավ մուսուլման կլինի, կարողացավ մնալ և տեղավորվել դեռևս նախապատերազմյան շրջանից գործող արհեստագործական դպրոցում: Արդեն 1918 թ. դեկտեմբերին կառավարությունը ստիպված վերջին 20 հոգուն ազատ է արձակել²⁴:

Ադանայի թուրքական որբանոցներում հայ որբերի խնդիրներին է անդրադառնում Գերմանիայի հյուպատոս Օլգեն Բյուզեն, ով 1915 թ. հոկտեմբերի 21-ին հաղորդում է. «Թուրքական որբանոցի տնօրենը սասներին բացատրել է, որ նրանք կամ իրենց դավանանքը կփոխեն կամ հարկադրված կլինեն լքել որբանոցը: Աղջիկների և տղաների մեծ մասը հեռացան որբանոցից, իսկ մնացած 14 տղաները, հավանաբար, իսլամացան: Տնօրենը երեխաներին բացատրել է, որ թուրքական որբանոցում քրիստոնեությունը տեղ չունի, անգամ աղոթելն արգելվելու է»²⁵:

Արմաշում նույնպես գործել է թուրքական որբանոց, որի մասին տեղեկանում ենք Հալեայի ազգային արխիվում պահվող նամակներից²⁶: Նամակներից մեկից հայտնի է դառնում, որ մոտ 200-250 որբերի Հալեայից, մասնավորապես Ա. Շիրաճյանի որբանոցից Կ. Պոլիս տեղափոխելու հրահանգ է տրվել: Որոշ ժամանակ անց հայտնի է դարձել, որ տղաներին տարել են Արմաշի դպրեվանք «եւ հոն իսլամութին ընդունողները դրած են Արմաշի այդ վանքին մէջ, անոնց կերակրելով ու թուրքերէն դասեր տալով»²⁷: Եպիսկոպոս Արտավազդ Սյուրմեյանին ուղղված մեկ այլ նամակից տեղեկանում ենք, որ Ահարոն Պատվելիի որբանոցից մոտ 400 տղաներ՝ 8-14 տարեկան, տեղափոխվել են Կ. Պոլիս: «Հոն թրքացնելու համար որբանոց մը

²³ Կյունցլեր Յ., *Արյան և արցունքների երկրում, իրադարձությունները Միջագետքում Համաշխարհային պարերազմի ժամանակ (1914-1918)*, Երևան, ՀՅԹԻ, 2011, էջ 66:

²⁴ Նույն տեղում, էջ 66-67:

²⁵ *Deutschland und Armenia 1914-1918...*, էջ 209:

²⁶ Ցեղասպանությանն ու դրան հաջորդող տարիներին բազմաթիվ նամակներ էին հասնում Հալեայի հայոց առաջնորդարան, որտեղ վերապրողները փնտրում էին իրենց հարազատներին: Նամակներում նրանք որոշակի մանրամասներ էին տալիս ու ակնկալում որևէ տեղեկություն ստանալ նրանց մասին: Երբեմն այդ տեղեկությունները տալվում էին մամուլում, երբեմն հայտարարվում էին եկեղեցու բեմից կամ էլ հանրային վայրերում էին փակցվում: Այնուհետև առաջնորդարանը որոնման արդյունքների մասին տեղեկացնում էր նամակի տիրոջը:

²⁷ Միհասեան Մ., *Սպասելով Ձեր պարասխանին...*, «Երթ», հ. 2, Հալեայ, Արեւելք, 2006, էջ 203:

բացուցցաւ եւ այդ տղա(ք)ները հոն մնացին մինչեւ պատերազմին վերջը որոնցմէ ողջ մնացողներ շատ եղած են»²⁸։ Արմաշի թուրքական որբանոցի մասին տեղեկանում ենք նաև Զավեն պատրիարքի հուշերից, որտեղ նշվում է, որ Արմաշի Չարխափան Ս. Աստվածածին վանքի վանահայրը, միաբանները, ուսուցիչները 1915 թ. տարագրվել են Կոնիա, իսկ վանքը կողոպտվել է, ու գավառի համար թուրքական կառավարության կողմից երկրորդական վարժարան է հիմնադրվել²⁹։

Սեբաստիայի տարագրության սկզբնական ժամանակահատվածում հայ երեխաներին ու պատանիներին հավաքել ու Մալաթիայի թուրքական որբանոց են տեղափոխել, սակայն 1916 թ. վերջերին արդեն Պոլսից ստացված նոր հրամանի համաձայն՝ նրանց էլ տարել ու սպանել են³⁰։

1914-17թթ. Խարբերդում ԱՄՆ-ի հյուպատոս Լեալի Դեխլը 1915թ. հուլիսի 10-ին տեղում որբանոց բացելու խնդրով դիմում է նահանգապետին, բայց կտրուկ մերժում է ստանում։ Վերջինս տեղեկացնում է, որ կառավարությունն է պատրաստվում մանկատներ բացել³¹։ Լ. Դեխլը նշում է, որ, իրոք, կառավարությունը մի շարք որբանոցներ է հիմնում և որոշ ժամանակ պատասպարում այդ որբերին, այնուհետև հավելում. «Հետո բոլորն էլ անհետացան և լուր տարածվեց, որ նրանց տարել են Խարբերդից քսան մղոն հեռու գտնվող մի լիճ, խեղդամահ արել»³²։

Անթուրայի որբանոցը³³ կառավարության հիմնած թուրքական որբանոցներից ամենամեծն էր, որը, դատելով մանկական հուշագրություններից, ականատեսների վկայություններից ամենադաժանն էր իր բարքերով, կիրառվող պատժամիջոցներով ու թրքացմանն ուղղված իր հետևողական գործողություններով։ Որբանոցի հիմնադրման ու որբահավաք աշխատանքներով հիմնականում զբաղվում էր Ջեմալ փաշան։ Նրա նախաձեռնությամբ Անթուրայի նախկին ֆրանսիական ճիզվիտական մենաստանում բացված որբանոցի աշխատանքներն իրականացնելու համար հատուկ Կ. Պոլսից Սիրիա և Լիբանան է հրավիրվում պանթուրքական գաղափարների կողմնակից, գրող Հալիդե Էդիպը³⁴, ով, տեղում ուսումնասիրե-

²⁸ Նույն տեղում, էջ 204։

²⁹ Զաւէն Արք., *Պատրիարքական յուշերս, վատերագիրներ եւ վկայութիւններ*, 1947, «Նոր Աստղ», Գահիրէ, էջ 286։

³⁰ «Պատմագիրք յուշամարեան Սեբաստիոյ եւ գաւառի հայութեան», կազմեց՝ Առաքել Ն. Պատրիկ, Պէյրութ, 1974, «Մշակ», էջ 752։

³¹ Լեալի Դ., *Սպանդի նահանգը*, Երևան, 2001, «Դավլ», էջ 134։

³² Նույն տեղում, էջ 135։

³³ Անթուրայի որբանոցի շուրջ 2000 հայ երեխաներից միայն 650-ն են վերապրել (տե՛ս Եղիայեան Բ., *Ժամանակակից պատմություն...*, էջ 250)։

³⁴ Հալիդե խանումը (Հալիդե Էդիպ Աղիվար, 1884-1964 թթ.) եղել է Թուրքիայում իր ժամանակի ֆեմինիստական շարժման հայտնի ակտիվիստ։ 1901 թ. հաճախել է կանանց ամերիկյան քոլեջ և ճանաչված է եղել որպես վիպագիր։ Նրա գրքերում քննադատության է ենթարկվել կանանց ցածր սոցիալական վիճակը Թուրքիայում։ Նրա առաջին՝ “*Seviye Talip*” վեպը հրատարակվել է 1909 թվականին։ Այրել է Մեծ Բրիտանիայում, Ֆրանսիայում և ԱՄՆ-ում։ Հալիդեն աջակցել է այն փաշաներին, ովքեր ծրագրել, կազմակերպել և իրականացրել են հայերի ցեղասպանությունը, իսկ հետագայում Նիզյար խանումի ընկերակցությամբ կարևոր դեր է խաղացել ողջ մնացած որբերին թրքացնելու գործում։

յով իրավիճակը, Նիզյար խանումի հետ պետք է զբաղվեր որբանոցների կրթական ու կազմակերպչական հարցերով: 1916 թ. ամռանը Հալիդեն արդեն Սիրիայում էր: Հետագայում իր *“Memoirs of Halide Edip”* հուշագրության մեջ նա պատմում է ժամանակի դեպքերն ու տալիս որբանոցի, Սիրիայում ու Լիբանանում թրքացման քաղաքականությունն իրականացնելու վերաբերյալ իր մեկնաբանություններն ու վերաբերմունքը: Գրքում տեղ գտած մանրամասներն իրենց բնույթով խիստ տարբերվում են իրականությունից: Հիմք ընդունելով մանկական հուշագրությունները, ականատեսների պատմությունները՝ կարելի է եզրակացնել, որ Հալիդե Էդիպի հուշագրությունը հիմնականում իր և իր կողմնակիցների գործունեությունն արդարացնող փորձ է:

գ. Թուրքական որբանոցներում կիրառվող մեթոդները

Ինչպես նշեցինք, թուրքական որբանոց մտնելու առաջին պարտադիր պայմանն անվանափոխությունն էր: Իրենց հուշագրություններում դրա մասին են հիշատակում գրեթե բոլոր որբերը:

Անթուրայի որբանոցում շուրջ երեքուկես տարի անցկացրած Գառնիկ Բանյանն³⁵ իր հուշերում պատմում է, որ որբանոցում նրան տրվում են 549 թիվը և Ահմեդ անունը: Իսկ մի անգամ, երբ մոռանում է իր թուրքական անունը, տնօրենի կողմից խիստ պատժվում է՝ դաժանորեն ծեծի ենթարկվելով: «Երկու օր վերջ իմացայ, գտնուած տեղս հիւանդանոցն էր եւ ես որբանոցի առաջին հիւանդն էի, առաջին զոհը թրքացման ճամբուն վրայ»³⁶:

Անթուրայի որբանոցի սան է եղել նաև Մելգոն Պետրոսյանը³⁷, ով, երկար ու դաժան տարագրության ճանապարհն անցնելուց հետո, միայն առաջին տպավորությամբ գրում է. «Անթուրա ... հրաշալի տեսքով դրախտավայր, տեսակ մը ոսկիէ վանդակ մէզի համար ... երկրէն ասդին առաջին անգամ ըլլալով հանգիստ քուն մը քաշեցինք ... Եթէ այսպէս շարունակուէր, փրկուած էինք»³⁸: Հաջորդ օրերին արդեն իրավիճակը փոխվում է. «Հայտարարում են, որ այն որ հաքք տինը (թուրք հաւատքը) կ'ընդունի, պէտք է նոր անուն ընտրէ ու արձանագրուի: Անոնք կ'եսօրին մասնաւոր միսով ճաշ, հաց ուզածին չափ պիտի ուտեն եւ այլն: Ուրեմն իսլամները հանրմ եւ էֆենտի ուտելէն վերջ կ'եալուրները պիտի ուտեն ... Միսին հոտը առինք մաս մը արձանագրուեցան»³⁹: Բացի դրանից տնօրենության կարգադրությամբ

³⁵ Գառնիկ Բանյանը ծնվել է Կյուրին քաղաքում 1910 թ.: Ցեղասպանության տարիներին տարագրվել է սիրիական անապատներ: Կարճ ժամանակահատված մնացել է Համայի որբանոցում, իսկ Ջեմալ փաշայի հրամանից հետո իր հետ եղած որբերի հետ տեղափոխվել է Անթուրա:

³⁶ Բանեան Գ., *Յուշեր մանկութեան եւ որբութեան*, Անթիլիաս, Կաթողիկոսութեան Հայոց Մեծի Տանն Կիլիկիոյ, 1992, էջ 137:

³⁷ Մելգոն Պետրոսյանը ծնվել է 1906 թ. Մարաշի մոտակայքում գտնվող Սարըլար գյուղում: Տարագրության դաժան ճանապարհներով քույրերի հետ հասել է Անթուրա, որտեղից փախուստի է դիմել 1918 թ. ապրիլին: Նրա ձեռագիր հուշերը՝ «Յուշեր Եղեռնի օրերէն, 1905-1918», պահվում են ՀՅԹԻ-ի գիտական ֆոնդերում:

³⁸ ՀՅԹԻ-ի գիտական ֆոնդեր, քժ. 8, ֆ. հ. 231, թպ. 148, էջ 12:

³⁹ Նույն տեղում, էջ 13:

ուտոդներն իրենց կերածի մասին պիտի պատմեին մյուսներին: Որբանոցի ղեկավարությունը չի սպասում Մելգոնի ու նրա 15 համագյուղացի երեխաների համաձայնությանը. «եկան խարազաններով տարին մեզի... թաց աչքերով մեյմէկ անուն որոշեցինք... եղայ Նէժիպ, թիւս ույ»:⁴⁰

Նորեկներին բաժանում էին ըստ դասարանների, տասնապետ նշանակում, ով հսկում էր իր խմբին, սխալ բան անելու համար նրանք կարող էին նաև ապտակել: Օրական մի քանի ժամ մարզանք էին անում գինվորական ձևով: Ցանկացած սխալ քայլ դատապարտվում էր ծեծի⁴¹:

Հարություն Ալբոյաջյանը⁴² երկու անգամ է անվանափոխվել: Առաջին անգամ Դերայում⁴³, այնուհետև՝ Անթուրայում, որտեղ ստացել է Շյուքրու անունը և 534 համարը⁴⁴:

Խորեն Գըլըճեանին⁴⁵ Հալեպից տանում են Կ. Պոլսի «Հարբիյե» գինվորական կենտրոնական դպրոց: Այստեղ բոլորին պղնձե կնիքներ են տալիս՝ իրենց նոր թուրքական անունով: Նա ստանում է «Ալի օղլու իսլամ» անունով կնիքը, որը տնօրենության կարգադրությամբ միշտ պետք է վզից կախված լիներ»⁴⁶: Նման իրավիճակում հայտնվելու կապակցությամբ նա գրում է. «Մեր յանցանքը հայ ըլլալն էր: Իսկ այսուհետև թիրքին պատկանելով, մեզի թիրք կը ճանչանան եւ ամէն միջոցի կը դիմեն... պիտի յաջողին մեզ թրքացնել եւ մեր ծնողները մոռցնել տալ»⁴⁷:

Մարդիկն երկսեռ թուրքական որբանոցի անվանափոխության արարողակարգից դրվագներ է ներկայացնում Մարի Գրիգորյանը⁴⁸: «Թրքական անուններու ցանկին մէջէն ինծի վիճակուեցաւ Այիշե անունը ... ամէնուս համար ինքնութեան թուղթեր շինուեցան, ուր առանց բացառութեան բոլորիս հայրերը կոչուեցան Ապտուլլահ, իսկ մայրերը՝ Սալիհէ...»⁴⁹: Որբանոցում նրանց անվանում էին մուհ-

⁴⁰ Նույն տեղում, էջ 14:

⁴¹ Նույն տեղում, էջ 12:

⁴² Հ. Ալբոյաջյանը ծնվել է 1904 թ. Մարաշի շրջանի Ֆընտըճագ գյուղում: Թուրքական կողմի կազմակերպած որբահավաքի արդյունքում նա Դամասկոսից տեղափոխվել է Անթուրա:

⁴³ Հ. Ալբոյաջյանի տեղեկությունների համաձայն՝ 1916թ. սկզբներին Դերայում վրանների տակ, նույնպես եղել է թուրքական որբանոց, որտեղ եղել են մոտ 200 երեխաներ, որոնց մի քանի թուրք պաշտոնյաներ նոր թուրքական անուններ են տվել: Նրան անվանակոչել են Սալեհ (տե՛ս Ալբոյաջյան Հ., *Խաչելության ճամփաներով*, Երևան, ՎՄՎ-ՊՐԻՆՏ, 2005, էջ 36):

⁴⁴ Ալբոյաջյան Հ., *նշվ. աշխ.*, էջ 40:

⁴⁵ Խորեն Գըլըճյանը ծնվել է 1910 թ. Էվերեկում, աքսորվել է Ռաքքայի և Դեր-Ջորի կողմերը: Նրա ձեռագիր հուշերը՝ «Վերապրող որբի մը յուշերը» խորագրով, պահվում են ՀՅԹԻ-ի գիտական ֆոնդերում:

⁴⁶ ՀՅԹԻ-ի գիտական ֆոնդեր, բժ. 8, ֆ. հ. 44, թպ. 42, էջ 23:

⁴⁷ Նույն տեղում, էջ 22:

⁴⁸ Մարի Գրիգորյան-Մարտիրոսյանը ծնվել է Ադանայում, վաղ մանկության տարիներին ակա-նատես է եղել Ադանայի կոտորածներին, հետո էլ 1915 թ. տարագրվել է Հալեպ, Ռաս ուլ-Այն: Ծնողների մահից հետո նրան որբահավաք կազմակերպող մարմինները տեղափոխել են Մարդիկն թուրքական որբանոց, որտեղ մնացել է շուրջ երեք տարի: Ձեռագիրը վերնագրված է «Ատանայէն Մարտիի թրքական որբանոցը (1908-1918)»:

⁴⁹ ՀՅԹԻ-ի գիտական ֆոնդեր, բժ. 8, թպ. 248, ֆ. հ. 397, էջ 72:

ղետի⁵⁰, գյավուր բառը խստիվ արգելված էր⁵¹: Ապրելով որբանոցային սահմանափակ առօրյան՝ հեղինակը գրում է. «Այսպես նետուած հսկայ ձուլարանին մէջ, իւրաքանչիւր տղայ պետք էր մոռնար իր ինքնութիւնը եւ դառնար իսկական թիւրք քաղաքացի»⁵²:

Ադանայի որբանոցում շուրջ վեց տարի անցկացրած Երվանդ Փոստալջյանն⁵³ իր հուշերում⁵⁴ պատմում է, որ տնօրեն Վահագն Տաթևյանի կալանավորվելուց հետո հայությունն իսպառ վերանում է որբանոցից: Նրանց տասնյակներով կանչում էին ու առաջարկում թուրք լինել, անունն ու կրոնը փոխել: Նրան անվանակոչում են Մեհմեդ Օղլի, համար տալիս: Անվանափոխության կապակցությամբ Երվանդը գրում է. «Մենք՝ որբերս մեր անունները չմոռնալու համար, թղթերի վրա գրված մեզ վրա էինք պահում: ...Որբանոցում կային իրենց անունն ու դավանանքը չփոխածներ: Նրանց տանում էին ներքևի հարկ, ծեծից մեռած դիակներ էին ցույց տալիս ու ասում. «Եթե թուրք չլինեք, ձեզ էլ այդպես շանսատակ կանենք»⁵⁵:

Համբարձում Չիթճեանը⁵⁶ նույնպես առաջին օրն ևնթ ստացել է Ռուշդի անունը, ստիպել են մոռանալ մայրենի լեզուն, դասի ժամանակ ազգայնական գաղափարներ են փորձել քարոզել՝ «...ազատություն, արդարություն, հավասարություն, մահ հանուն մեկ հայրենիքի, քանի որ օսմանցի ենք, օսմանցի եղբայրներ ենք» և նմանատիպ այլ կարգավորումներով⁵⁷:

Մինչդեռ Ջեմալ փաշան անվանափոխության երևույթը լրիվ այլ երանգավորմամբ է ներկայացրել: 1916 թ. սեպտեմբերին Հալիդե Էդիպը Ջեմալի հետ ունեցած գրույցի ժամանակ անվանափոխության հարցի առնչությամբ արտահայտվել է, թե «դա նման է կրոնափոխության», որին հետևել է Ջեմալի պարզաբանումը, որ ինքը ստիպված է դա անում, քանի որ այլևս գումարներ չկան՝ հայկական որբանոց հիմնելու համար ... Սա իսլամական որբանոց է և միայն մուսուլման երեխաներին է

⁵⁰ Մուհդետի՝ նորադարձ, որբանոցներում այսպես են անվանել նոր իսլամ ընդունած երեխաներին:

⁵¹ ՀՅԹԻ-ի գիտական ֆոնդեր, քժ. 8, թպ. 248, ֆ. հ. 397, էջ 72:

⁵² ՀՅԹԻ-ի գիտական ֆոնդեր, քժ. 8, թպ. 248, ֆ. հ. 397, էջ 74-75:

⁵³ Երվանդ Փոստալջյանը ծնվել է 1903 թ. Հաճրն քաղաքում: Հայրը զոհվել է Հաճրնի 1909 թ. ինքնապաշտպանական մարտերի ժամանակ: Շուրջ 230 երեխաների քարավանի հետ նա անցել է Ադանա, որտեղ նրանց խնամատարությունը ստանձնել է Վահագն Տաթևյանը (1875-1916): Շուրջ 1600 որբեր ապաստանել են Քարդա որբանոցում, որը վերանվանել է Ջեմալ փաշայի անունով: 1915 թ. փետրվարին թուրքական կառավարության հրամանով Վահագն հայրիկին ու 32 հայ ուսուցիչների բանտարկել են, որից հետո որբանոցի ղեկավարումն անցել է թուրքական կողմին:

⁵⁴ Նրա ձեռագիր հուշերը՝ «Կիլիկիայի 1600 որբերից մեկի՝ Երվանդ Փոստալջյանի ճակատագիրը» խորագրով, պահվում են ՀՅԹԻ-ի գիտական ֆոնդերում:

⁵⁵ ՀՅԹԻ-ի գիտական ֆոնդեր, քժ. 8, թպ. 93, ֆ. հ. 4164, էջ 14:

⁵⁶ Համբարձում Չիթճեանը ծնվել է 1901 թ. Չարսանջակ գավառակի Իսմայիլ գյուղում: Իր երեք եղբայրների հետ հայտնվել է թուրքական «մեքթեպ»-ում, որտեղ կառավարությունը կենտրոնացրել էր 4-14 տարեկան շուրջ 150-200 տղաների:

⁵⁷ Չիթճեան Հ., *Մազի չափ մահին մոտ*, London and Reading, 2004, Taderon Press, էջ 91:

թույլատրվում, իսկ Անթուրայի որբանոցը նախատեսված էր միայն թուրք երեխաների համար⁵⁸:

Թուրքական որբանոցներում գործել է պատժամիջոցների մի ամբողջ ցանկ: Սա ևս մեկ անգամ փաստում է, որ կրոնափոխությունն ու անվանափոխությունն իրականացվել են բռնի միջոցներով: Հուշագիրները նկարագրել են որբանոցներում կիրառվող պատժամիջոցները, որոնց ենթարկվել են նաև իրենք: Անթուրայում կիրառվող խիստ պատժամիջոցներից էր ֆալախան⁵⁹: Գ. Բանյանը նկարագրում է, թե ինչպես է ենթարկվել ֆալախայի, երբ մի օր հայերեն «բառ մը դուրս թռաւ բերնէս ... մատնող եղեր էր եւ նոյն իրիկունը պառկեցայ ֆալախայի հարուածներուն տակ: Դեռ հինգ տարիքս չէի լրացուած»⁶⁰:

Այսպես, երկու տարի շարունակ, ամեն մայրամուտի, որբերի սիրտը կծկվում էր, մղձավանջով լցվում... դրոշի արարողությունից հետո մոտ հազար տղաներ ականատես ու վկա էին դառնում ֆալախայի արարողությանը⁶¹:

Հ. Ալբոյաճյանը նույնպես անդրադարձ է կատարել Անթուրայում կիրառվող պատժամիջոցներին՝ ընդլայնելով ցուցակը. «Եթե որևէ մեկը հայերեն էր խոսում... նրան խիստ պատժում էին: Կամ ծեծում էին կամ ստիպում ճաշարանի կտորին կանգնել ու երեք-չորս ժամ արևին նայել: Ամենածանր պատիժը ֆալախան⁶² էր»⁶³: Գ. Բանյանը նույնպես հիշում է, որ իրենց որբերից Աբրահամը որպես պատիժ երկու օր մինչ արևի մայր մտնելը վերակացուի հսկողության տակ նայել է արևի կիզիչ ճառագայթներին⁶⁴: Հաճախ որբանոցից անտառ ուտելիքի համար փախչող երեխաներին էլ 24 ժամ բանտարկում էին ու ոչինչ չէին տալիս ուտելու՝ ճաշի ժամին բոլորի ներկայությամբ ենթարկելով ֆալախայի: Անգամ որբանոցի մյուդիրներից Ռաշիդ բեյը նոր ու ավելի դաժան պատժամիջոց է հնարում կարգազանց երեխաներին պատժելու, բայց նրա «հորինած» պատժին ոչ ոք «չարժանացավ»⁶⁵: Ֆալախայի կիրառման համար որբանոցում գործել է հստակ «ուղեցույց», որտեղ նշվել է, թե որ «հանցագործության» դեպքում քանի անգամ պետք է ֆալախայի ենթար-

⁵⁸ *Memoirs of Halide Edip...*, էջ 428-429:

⁵⁹ Արտավազդ արք. Սուրմեյանն անդրադարձել է ֆալախայի՝ որպես պատժամիջոցի գործադրմանը, համաձայն որի. «Գողութիւնը կը պատժուի երբեմն ձեռքը կտրելով, բայց հաճախ գաւազանի ծեծով՝ որ ատելի թեթեւ յանցանքներու պատիժն է: Ֆալախայ է գործածուած ձեռք»: Այս տեղեկությունը թույլ է տալիս եզրակացնել, որ ֆալախան որպես պատժամիջոց չի ստեղծվել որբանոցների համար, այն ուղղակի վերցվել է իսլամական պատժամիջոցների ցանկից: Տե՛ս Սիւրմէեան արք. Ա., *Պատմութիւն Հալէպի Հայոց*, Հալէպ, Կիլիկիա, 2006, հ. Բ, էջ 509:

⁶⁰ Բանեան Գ., *նշվ. աշխ.*, էջ 159:

⁶¹ Նույն տեղում, էջ 158:

⁶² Ֆալախայի ժամանակ փայտի ծայրերին ամրացնում են ոչ ձիգ պարան, պատիժը կրողի ոտքերն անցկացնում են փայտի և պարանի միջև, հետո սկսում են փայտը պտտեցնել, իսկ երրորդ անձը ձեռքի գավազանով խփում է պատժվողի ոտքերին, մինչև ոտքերից արյուն գալը (մանրամասն տե՛ս Ալբոյաճյան Հ., *նշվ. աշխ.*, էջ 44):

⁶³ Ալբոյաճյան Հ., *նշվ. աշխ.*, էջ 44-45:

⁶⁴ Բանեան Գ., *նշվ. աշխ.*, էջ 186:

⁶⁵ Նույն տեղում, էջ 45:

կել⁶⁶: Դասերն ընթացել են նախատինքների, վիրավորական խոսքերի, պատի տակ դրված ծանր քարերի, դռան հետևում դրված տարբեր չափերի գավազանների, ֆալախայի գործիքի առկայությամբ⁶⁷:

Թուրքական «մանկավարժությունը» կիրառել է հնարավոր բոլոր ձևերը. «Բան մը բաց ձգված չէր: Գործադրուած էր ինչ որ թուրքական ուղեղը կրնար յղանալ»⁶⁸: Իսկ Հալիդե Էդիպը որբանոցի կարգուկանոնին նայում էր մեծ խանդավառությամբ: Նա վստահ էր, որ մի քանի տարի հետո թրքացած որբերը պիտի ազնվացնեին թուրք արյունը⁶⁹:

Մարդիկն որբանոցում դասընթացի ժամանակ աղմուկը պատճառ էր դառնում, որ ուսուցչուհին «օրհնյալ գավազանով» ծեծի երեխաներին, հետո էլ դաժան ցրտին բակ դուրս բերի՝ անունները կարդալու համար⁷⁰:

Նման որբանոցներում պարտադիր էին նաև իսլամի դասերը: Մելգոն Պետրոսյանն իր հուշագրությունում մի քանի դրվագներ է բերում այդ դասերից: Ֆեյզի փաշան քրիստոնեության մասին խոսելիս նշել է. «...ձագուկներս, ձեր կրոնը հինգս՝ Երեմիայի կողմից էր հայտնված, ձեր թագավորն էր Դավիթ, ձեր լիակատար թագավորն էր Եսայի, ձեր լիակատար թագավորն էր Երեմիայի, ձեր լիակատար թագավորն էր Եսայի, ձեր լիակատար թագավորն էր Եսայի»⁷¹: Երեմիայի հուզմունքը լացի է վերածվել, երբ նա շարունակելով ասել է. «Մուհամմեդ մարգարէին կրօնքը ամէնէն շիտակն է, պէտք է այդ կրօնքը ընդունիք»⁷²:

Մարդիկն որբանոցում իսլամի դասերին պարտադիր հատվածներ են սովորել Դուրանից, դրան զուգահեռ սովորել են նաև իսլամական օրենքների համաձայն լվացվել ու նամազ անել: Ամեն օր կրոնի դասերին նրանց շարք են կանգնեցրել՝ նամազ անելու: Ծնկի գալու պահին ամեն անգամ ծիծաղի ալիք էր բարձրանում, սաստելն ու խրատելն անօգուտ էին դառնում: Արդյունքում կրոնի դասերի ցանկից նամազը հանվում է⁷³:

Որբանոցներում պարտադիր պայմաններից է եղել նաև թլպատումը: Եթե երեխաներն անվանափոխության կամ իսլամ ընդունելու փաստն ինչ-որ կերպ ընդունում էին ու համակերպվում՝ թեկուզ առերես, ապա թլպատման արարողակարգին նրանք ամենաշատն էին ընդդիմանում: Որբանոցներում, երբ այդ մասին լուրեր էին տարածվում, տղաներից շատերը փախուստի էին դիմում: Հ. Ալբոյաճյանը գրում է. «Լուր տարածվեց, թե այդ մարդիկ եկել են որբերին թլպատելու: Որբերը, իմանալով այդ մասին, սկսեցին որբանոցից անհետանալ, ով ուր կարող էր»⁷⁴:

⁶⁶ Բանեան Գ., *նշվ. աշխ.*, էջ 157:

⁶⁷ Նույն տեղում, էջ 153-154:

⁶⁸ Նույն տեղում, էջ 162-163:

⁶⁹ Նույն տեղում, էջ 168:

⁷⁰ ՀՅԺԻ-ի գիտական ֆոնդեր, քժ. 8, ֆ.հ. 397, թպ. 248, էջ 81:

⁷¹ ՀՅԺԻ-ի գիտական ֆոնդեր, քժ. 8, ֆ. հ. 231, թպ. 148, էջ 13:

⁷² Նույն տեղում, էջ 13:

⁷³ ՀՅԺԻ-ի գիտական ֆոնդեր, քժ. 8, ֆ. հ. 397, թպ. 248, էջ 79:

⁷⁴ Ալբոյաճյան Հ., *նշվ. աշխ.*, էջ 43:

Աղանայի որբանոցի սան Երվանդ Փոստալյանն իր հուշերում գրում է, որ որբանոցի տնօրենը թերթում հայտարարություն է տվել ու թուրք հավատացյալներին որբանոցի հայ երեխաների թլպատման արարողությանը ներկա գտնվելու կոչ արել: Երվանդ Փոստալյանն իր հուշերում գրում է. «Գալիս էին թուրք մարդիկ ու խանումներ, նախ և առաջ երեխաներին բաղնիք տանում, շան կեղտով լվանում, որպեսզի հայության մեռոնից ու կրոնից դուրս գան, հետո դառնան իսկական թուրք: Հետո կնքահայրը գրկում էր երեխային, իսկ քիթվեն դիռ, զուռնայի հնչյունների տակ թլպատում էր»⁷⁵: «Անմարդավայել թլպատումից», ինչպես հուշագիրն է նշում այդ երևույթը, երեք ընկերներով խուսափում են ու որբանոցից գիշերով փախուստի դիմում⁷⁶:

Խորեն Գըլըճյանը հիշում է, որ իրենց որբանոցում տնօրենության հրամանով բոլոր հայ երեխաներին տարել են Կ. Պոլիս ու թլպատել են⁷⁷:

Թուրք ղեկավարները պարբերաբար այցելում էին որբանոցներ, ինչը միշտ ուղեկցվում էր տոնախմբությամբ ու բարձր ծափողջույններով: Մանկական հուշագրություններում այդ իրադարձությունը միշտ նույնացվել է համեղ ուտելիքների, տոնական ու կեղծ բարիդրացիական մթնոլորտի հետ: Ջենալ փաշան մի քանի անգամ այցելել է Անթուրայի որբանոց, Էնվեր և Թալեաթ փաշաները՝ Հարբիեի:

Գ. Բանյանի հուշերում Ջենալ փաշայի այցերից մեկի ժամանակ արտառոց է եղել այն փաստը, որ երեխաները դուրս են եկել վերահսկողությունից: Մի քանի հոգի մոտեցել են փաշային՝ դիմելով՝ «... անօթի ենք, հոս պ անօթի պիտի մեռնինք ... հասիր մեզի...»: Այդ ընթացքում նրան մի քանի տասնյակ տղաներ են շրջապատել, որոշ երեխաներն էլ բակի ծառերի վրա են բարձրացել ու «պոռպոռալով ավիով տերեւները եւ վայրի պտուղները քաղելով բերանսին թխմել»⁷⁸: Սա թերևս միակ դեպքն է եղել, մյուս բոլոր այցերի ժամանակ խիստ կարգուկանոնի պայմաններում հայ երեխաների նվագախումբը դիմավորել է նրան:

Մ. Պետրոսյանի հուշերում նշվում է. «...մեծ ճիգ կը թափեին որ կարգապահությամբ ըլլայ ... ամէն կողմ զարդարեցինք ու մաքրեցինք...»⁷⁹: Նա շրջել է բոլոր դասարաններով, «...մարզանքի տողանցքը ըրինք, տեսնելով որ շատ լավ եւ չափաւոր կը քալէինք, փաշան գոհ մնաց»⁸⁰: Ճաշարանում նրանց լավ կերակրել են «ճոխ սեղանի» շուրջ⁸¹:

1917 թ. Ջենալ փաշան կրկին այցելել է որբանոց. այս անգամ «...ֆանֆարը մեր տղաքները նուագեցին եւ մեզմէ մէկը սրինգով, շատ լաւ նուագեց, այս անգամ աւելի ներկայանալի էինք որմէ շատ գոհ մնաց փաշան»⁸²: Հալիդե Էդիպն արտա-

⁷⁵ ՀՅԹԻ-ի գիտական ֆոնդեր, բժ. 8, թպ. 93, ֆ. հ. 4164, էջ 15:

⁷⁶ Նույն տեղում:

⁷⁷ ՀՅԹԻ-ի գիտական ֆոնդեր, բժ. 8, ֆ. հ. 44, թպ. 42, էջ 27:

⁷⁸ Բանեան Գ., *նշվ. աշխ.*, էջ 148:

⁷⁹ ՀՅԹԻ-ի գիտական ֆոնդեր, բժ. 8, ֆ. հ. 231, թպ. 148, էջ 14:

⁸⁰ Նույն տեղում, էջ 15:

⁸¹ Նույն տեղում:

⁸² Նույն տեղում:

հայտնվել է հայ երեխաների երաժշտական ընդունակությունների վերաբերյալ՝ հայտարարելով, որ նրանք լավ երաժիշտներ էին ու դպրոցի հպարտությունը⁸³:

Մարդիկսի որբանոցի տնօրենը՝ ազգությամբ լազ Շինաս Բեյը, որբերին ցուցում էր տվել, որ գինվորական հրամանատարի՝ որբանոց կատարած այցի ընթացքում սննդի մասին հարցնելիս ասեն՝ «միշտ անօթի ենք»⁸⁴: Այս այցը դրական արդյունք է ունենում, և որբանոցը սկսում է գինվորական նպաստներից էլ օգտվել: Նա երեխաներին տանում էր անգամ գինվորական, կառավարական ու ժողովրդական տոնախմբությունների⁸⁵:

Որբանոցներում երեխաների թիվը նվազեցնելու համար եղել են նաև թունավորման դեպքեր: Հաճախ «բնական ճանապարհով» թունավորվել է ջուրը, երբ դիակներ են գցել որբանոցներին ջուր մատակարարող ջրհորները: Մարդիկսի որբանոցում թունավորման դեպքերը կապված էին հատկապես հացի օգտագործման հետ: Այդ կապակցությամբ Մարի Գրիգորյանը գրում է. «Օրերով հացի երես չտեսնելուց հետո ... երբ հաց ունենայինք, տոդոցմէ ոմանք կը թունաւորուէին եւ կը մեռնէին կապուտցած: Երբ հացը կը կտրուէր, հիւանդութիւնն ալ կ'անհետանար հրաշքով»⁸⁶:

Անթուրայի որբանոցում 1918 թ. վերջին թուրքական անձնակազմը հեռանալուց առաջ պատվիրել է դեղագործ Ռեզա Բեյին վերջին ընթրիքի ժամանակ բոլոր որբերին թունավորել ու նոր միայն հեռանալ: Բայց Ռեզա Բեյը ի կատար չէր ածել այդ հրամանը: Հետաքրքրական է այն փաստը, որ ճաշարանում նստած բոլոր երեխաներին հարցրել էր իրենց հայկական անունները, և բոլորը պատասխանել էին⁸⁷:

Մի որոշ ժամանակ որբանոցում մնում են միայն մի քանի թուրք պահակներ, արաբ հսկիչներ, ովքեր զբաղվում էին հագուստի ու ուտելիքի խնդիրներով: Չնայած 1917 թ. Անթուրայում կենսապայմանների դրական փոփոխություններ էին եղել, անցկացվել էին ջրագիծ, կոյուղագիծ, ինչպես նաև որբանոցը էլեկտրաֆիկացվել էր⁸⁸, սակայն դա էապես չէր ազդել որբերի վիճակի բարելավման վրա:

1918 թ. սեպտեմբերին Արարայի ճակատամարտից հետո հայ կամավոր Պ. Պզտիկյանն ու մոտ հազար հոգանոց գումարտակը Բեյրութից Ջունեյ անցնելիս այցելել է Անթուրայի որբանոց: Պզտիկյանն իր ձեռագիր հուշագրությունում՝ թվագրված 1918 թ. դեկտեմբերի 6-ով, ներկայացրել է իրենց կարճատև այցի մանրամասները՝ ընդգծելով «...այդ կարօտակիզ փոքրիկ էակները, որոնց անգութ բաղդը զրկած էր իսպառ ծնողական ջերմ համբոյրէ»: Հրաժեշտից առաջ սրտապնդող հորդորներ են անում, որ «ազգը չի մոռնար իր փոքրիկ գաւակները»: Պզտիկյանը եզրափակում է իր հուշը հետևյալ տպավորությամբ. «...այդ որբանոցը,

⁸³ *Memoirs of Halide Edip...*, էջ 449:

⁸⁴ ՀՅԹԻ-ի գիտական ֆոնդեր, քժ. 8, ֆ. հ. 397, թպ. 248, էջ 85:

⁸⁵ Նույն տեղում:

⁸⁶ Նույն տեղում, էջ 76:

⁸⁷ Տե՛ս Ալբոյաճյան Հ., *նշվ. աշխ.*, էջ 50:

⁸⁸ Տե՛ս *Memoirs of Halide Edip...*, էջ 431:

դաժան, ցուրտ որբանոցը, փոքրիկ հոգիներուն մէջ իր մտայլը կը սփռէր: Յալի բոյնն էր անիկայ»⁸⁹:

Որոշ ժամանակ անց Պզտիկյանն ընկերների հետ նորից է այցելել Անթուրա: Տպավորությունը նրա համար կրկին ցավալի էր. «Ոմանք հողի վրայ վիզիւնին ծռած՝ լուռ ու մունջ նստած ին, ուրիշներ կու լան... պատանիներ, որոնք տարիներու ծանրութեան տակ ճնշուած ծերուկի մը փոսուացած աչքերը և կմախքացած այտի-րը մատնանիշ կ'ընին»: Նա երկար գրուցել է որբերի հետ, հետո շրջայց է կատարել որբանոցում: Նրա աչքին զարնում է այն մեծ տարբերությունը, որը նա տեսնում է ուսուցիչների ու որբերի կենսապայմանների ու սննդի միջև»⁹⁰:

Հիվանդանոցային սենյակներում մոտ հարյուր երեխաներ են եղել, որոնց մասին հուշագիրը պատմում է. «...քով քովի, զոյգ զոյգ պառկած ին: Ոմանք հալած, կմախքացած, միծ փայլուն աչքերնին առաստաղը»⁹¹: Դաստիարակչուհին արդարացել է, թե «...բժիշկնիս ծիր է և իր պաշտօնին օգտակար ըլլալու յարմարութիւնէ գուրկ, սնունդը բոլորովին աննպաստ, կաթը որ ամենէն սովորականն է, կիսով ջրախառն»⁹²: Մյուս սենյակում աղիքային հիվանդությամբ երեխաների վիճակից ազդվելով՝ գրում է. «...պաղ սալահատակի վրայ փռուած անկողիններու մէջ պառկած անխօս բանտարկուածներու պէս կ'իրագին: Հոս ալ չկայ լուրջ խնամք մը, ապաքինումը բաղդի քմահաճոյքին յղուած է»⁹³: Վարակների տարածումը կանխելու համար զգուշութեան ոչ մի միջոց չէր ցուցաբերվում: Տեսուչի հետ զրոյցի ժամանակ Պզտիկյանը քսանից ավելի մանուկների է տեսնում միջանցքով անցնելիս՝ «բոբիկ, ճիրմակ գիշերանոցով, ճիրմակ շղարշ մը գլուխին»⁹⁴: Հուշագիրը նշում է, որ նրանց որբանոցում «գոնչիր»⁹⁵ էին անվանում⁹⁶: Պզտիկյանի նամակները ևս փաստում են, որ Անթուրայում իրավիճակը ծանր էր, իսկ քաղաքական նման պայմաններում հայ որբերը լրիվ բախտի քմահաճոյքին էին թողնված:

դ. Որբերին հայ ինքնությանը վերադարձնելու ձեռնարկումները

1918թ. Մուդրոսի զինադադարից հետո մեծ թափ են ստանում որբահավաք աշխատանքները: Բազմաթիվ կազմակերպություններ հավաքագրում էին հայ որբերին, նոր որբանոցներ էին բացվում, կամ թուրքական որբանոցներն անցնում էին տարբեր միսիոներական կամ բարեգործական կազմակերպությունների: 1919 թ. ապրիլի 17-ին Կ. Պոլսում՝ Ազգային խնամատարության կազմում, ստեղծվում է Որբա-

⁸⁹ ՀՅԹԻ-ի գիտական ֆոնդեր, բժ. 8, ֆ. հ. 255, թպ. 155:

⁹⁰ Նույն տեղում:

⁹¹ Նույն տեղում:

⁹² Նույն տեղում:

⁹³ Նույն տեղում:

⁹⁴ ՀՅԹԻ-ի գիտական ֆոնդեր, բժ. 8, ֆ. հ. 256, թպ. 155:

⁹⁵ Գոնչիր՝ թուրքերենից թարգմանաբար՝ մեծագլուխ: Սրանք այն երեխաներն էին, որոնք ցեղասպանության տարիներին սարսափելի նիհարել էին, փոխարենը մարմնի համեմատ գլուխներն էին չափից ավելի մեծացել:

⁹⁶ ՀՅԹԻ-ի գիտական ֆոնդեր, բժ. 8, ֆ. հ. 256, թպ. 155:

հավաք մարմինը, որը ղեկավարում էր Առաքել Չաքրյանը: Կազմակերպությունը, ունենալով Կ. Պոլսում բրիտանական դեսպանատան պաշտոնյա, հրամանատար Սմիթի աջակցությունը, ավելի ընդգրկուն է դարձնում որբահավաք աշխատանքները: 1919 թ. ապրիլի 4-ի իր տեղեկագրում, ի թիվս այլ հայանպաստ գործողությունների, Ա. Չաքրյանն առաջին կետով նշում է. «Թուրք որբանոցներէ եւ տուններէ ազատել հայ որբերը»⁹⁷:

Անթուրայում թուրքական կողմի հեռանալուց հետո տեղի Ամերիկյան կարմիր խաչի աշխատակից Բայարդ Դոջն օգնություն է հատկացրել որբանոցին: Տնօրեն է նշանակվել պարոն Քրոուֆորդը: Հայ ուսուցիչներ են աշխատանքի անցել, ուսուցումը կատարվել է հայերենով և անգլերենով: Սկսվել է հայացման գործընթացը. բոլորը վերականգնել են իրենց հայկական անունները, մայրենի լեզվի դասերը: «Քանի ամիս մը հետո... հեզելով, ծանր-ծանր վանկերը կապելով բառերը դուրս կուգան տղոց քերնէն»⁹⁸:

Հետագայում Մերձավոր Արևելքի նպաստամատույց կազմակերպությունն է ստանձնել որբանոցի խնամակալությունը, մինչև 1919-ի աշունը, երբ արական սեռի 470 որբերին ուղարկել են Հալեպ, իսկ իգական սեռի 200 որբերի՝ Լիբանանի Ղազիր ավանում գտնվող հայկական որբանոց⁹⁹:

Խ. Գըլըճյանը հիշում է, որ հայ կաթուղի վարդապետ Հովհաննես Նալբանդյանն այդ ժամանակ եկել է որբանոց՝ հայ որբերին տանելու: Որբանոցում այդ ժամանակ կար մոտ 2500 երեխա: Նա երեխաներին դիմել է հայերենով. «...հայ զաւակներս, պատերազմը վերջացած է, ես եկած եմ ձեզ այս դժոխքէն ազատելու, մի վախնաք, ինծի վստահեցէք, դուք պիտի վերադառնաք հային ծոցը, եւ պիտի վերագտնէք ձեր մայրերը, որ գիշեր եւ ցերէկ լացին»¹⁰⁰: Այս խոսքերից հետո մոտ 200 հոգի մոտեցել են քահանային: Այս փաստը ոգևորել է վարդապետին, ով «...յաջողած էր իր առաքելութեան մէջ»¹⁰¹: Տարիներ անց Խորենը, վերլուծելով այդ օրվա դեպքերը, նշում է. «մէզմէ փոքրիկները մնացին թրքական որբանոցի մէջ ու կորսուեցան...»¹⁰²:

Մարի Գրիգորյանը հիշում է արդեն Բեքեքի որբանոց իրենց այցելած հայ քահանային ու մի քանի հայ տիկիների, ովքեր գինադադարից հետո եկել էին հայ որբերին տանելու: Արմենուի Բոյաճյանը որբերին կոչ է արել վերհիշել մայրենի լեզուն¹⁰³:

⁹⁷ Զաւեն արք., *նշվ. աշխ.*, էջ 289:

⁹⁸ Բանեան Գ., *նշվ. աշխ.*, էջ 272:

⁹⁹ Բարսեղյան Ն., Միսակ Քելեշյանի բացահայտումները թուրքացած հայ որբերի վերաբերյալ (տե՛ս <http://akunq.net/am/?p=3029>):

¹⁰⁰ ՀՅԹԻ-ի գիտական ֆոնդեր, քծ. 8, թպ. 42, ֆ. հ. 44, էջ 29:

¹⁰¹ Նույն տեղում:

¹⁰² Նույն տեղում:

¹⁰³ ՀՅԹԻ-ի գիտական ֆոնդեր, քծ. 8, թպ. 248, ֆ. հ. 397, էջ 94-95:

Կեսարիայի հայրենակցական միության ջանքերով տեղի թուրքական որբանոցի երեխաները Հալեպ ու Կ. Պոլիս են փոխադրվել¹⁰⁴:

Այսպիսով, երիտթուրքական կառավարության ռազմավարությունը նպատակ ուներ թիրախային խմբին, տվյալ դեպքում հայ երեխաներին գրկելու սեփական կենսաքանական-ռասայական բնորոշումներից, ինքնությունից՝ աստիճանաբար վերածելով մի այլ ինքնության: Նա հետևողականորեն, ծրագրված հետամուտ է եղել այս քաղաքականությանը մինչև 1918 թ. Մուդրոսի զինադադարի կնքումը, հետագայում թուրքական որբանոցները հանձնվել են միսիոներական, օտարերկրյա և հայկական կազմակերպություններին:

Հայ որբերի թրքացման գործընթացն իրականացվել է մի քանի փուլերով, որից առաջինը հավաքագրման ու տեղափոխման հարցերի լուծումն էր: Օսմանյան կառավարությունը շտապում էր նրանց հավաքագրել, քանի որ մտավախություն ուներ, թե միսիոներական, բարեգործական կազմակերպություններն իրենից շուտ կհաջողեն այդ գործում: Երկրորդ փուլով նրանք, հայ որբերին կենտրոնացնելով որբանոցներում, սկսում էին բուն գործընթացը՝ նրանց անվանափոխելով, թլպատելով, իսլամի դասեր կազմակերպելով: Չնայած «Բացահայտումները թուրքացած հայ որբերի վերաբերյալ» հոդվածում¹⁰⁵ նշվում է, որ հայ երեխաներին անվանափոխում էին՝ պահպանելով նրանց նախնական անունների սկզբնատառերը, սակայն նշենք, որ հուշագրություններում մենք նման դեպքերի չենք հանդիպել, ավելին՝ թուրքական կողմը խուսափում էր նմանօրինակ մանրուքներից անգամ, որը հայ որբերին կհիշեցներ իրենց անցյալը: Նրանք նախընտրում էին երեխաներին դիմել միայն իրենց թվերով՝ գրկելով նրանց ոչ միայն իրենց ազգային ինքնությունից, այլ նաև անհատականությունից: Դեպքեր են եղել, երբ ղեկավարությունը որբանոցում աշխատակիցներ չունենալու պարագայում էլ հեռացրել է որբանոցում աշխատող հայ կանանց՝ վախենալով, որ նրանց ներկայությունը որբերի համար կարող է հայկական ինքնագիտակցության խթան դառնալ:

Վախի մթնոլորտը, պատժամիջոցների կիրառումն առաջին հայացքից կարծես հաջողում են. որբերը դադարում են միմյանց հետ խոսել հայերեն, սակայն հուշագրություններում բոլոր հեղինակները նշում են, որ քնելուց առաջ ծածկոցի տակ միշտ խաչակնքել են, ծնողներից լսած «Հայր մեր»-ից հատվածներ կրկնել, երբեմն էլ աղոթք չհիշելով՝ իրենց ու իրենց հարազատների անուններն են կրկնել՝ չմոռանալու համար:

Թուրքական կառավարությունն իր այս քաղաքականության իրագործման ընթացքում միշտ էլ մտավախություն է ունեցել և վերապահությամբ է մոտեցել իսլամացած հայերին: Նշենք, որ Կ. Պոլսից հրաման է եղել, որով իսլամանալու

¹⁰⁴ Ուշագրավ է այն փաստը, որ «իբրև» թուրք արձանագրված որբերի հայ լինելու փաստը ստուգելու համար ստեղծված խառը հանձնաժողովն արձանագրել է, որ 319 երեխաներից մոտ 50 տոկոսը մոռացել էին իրենց ծագումը: Մանրամասն տե՛ս Եղիայեան Բ., *Ժամանակակից պարմություն...*, էջ 97-98:

¹⁰⁵ Տե՛ս Բարսեղյան Ն., Միսաք Քելեշյանի բացահայտումները թուրքացած հայ որբերի վերաբերյալ...:

թույլտվություն է տրվել միայն կենտրոնական իշխանությունների հավանությունը ստանալուց հետո կամ էլ միայն մուսուլմանների հետ ամուսնացած կանանց¹⁰⁶։ Որբանոցներում ավելի հեշտ էր վերահսկել իսլամացման գործընթացը, որին էլ ի սկզբանե միտված էր թուրքական կառավարությունը։ Սակայն նրա քաղաքականությունը երկար չի գործում։ 1919 թ.՝ զինադադարի առաջին վեց ամիսներին, կարևոր միջոցներ են ձեռնարկվում որբերին վերադարձնելու ուղղությամբ։ «Որբահավաքի» ժամանակ միջազգային կազմակերպությունները, մասնավորապես Ամերիկյան Մերձավոր Արևելքի նպաստամատույցը, Լոնդոնի քաղաքագլխի հիմնադրամը, դանիական, շվեյցարական ու այլ կազմակերպություններ կարողանում են որբանոցներից դուրս բերել և փրկել թրքացման ճանապարհին գտնվող բազմաթիվ հայ երեխաների։ Սակայն պետք է նշել, որ առավել փոքր տարիքի երեխաների մի ստվար հատված, չհիշելով իր ինքնությունը, երբեմն էլ անցյալի վերապրումները կրկնվելու վախից ելնելով, նախընտրել է լռել իր հայ լինելու մասին և այս ճանապարհով ձուլման է ենթարկվել։

**ՀԱՅ ԵՐԵՒԱՆԵՐԻ ԹՐՔԱՅՄԱՆ ԳՈՐԾԸՆԹԱՅՆ ՕՍՄԱՆՅԱՆ
ԿԱՅՍՐՈՒԹՅԱՆ ՊԵՏԱԿԱՆ ՈՐԲԱՆՈՅՆԵՐՈՒՄ (1915 -1918ԹԹ.)**

Նարինե Մարգարյան

ԱՄՓՈՓՈՒՄ

Հայ երեխաների թրքացման քաղաքականությունը երիտթուրքական կառավարությունն իրականացրել է նաև պետական մակարդակով, որի համար հիմք են ծառայել պաշտոնական հրամաններն ու հեռագրերը։ Թուրքական որբանոցներ են բացվել Հալեպում, Անթուրայում, Բեյրութում, Դամասկոսում, Մերդինում, Արմաշում, Ուրֆայում, Դիարբեքլիում, Մալաթիայում, Խարբերդում, Կեսաբիայում և մի շարք այլ բնակավայրերում։ Հայ երեխաներին հավաքագրելուց ու որբանոցներում կենտրոնացնելուց հետո սկսվում էր բուն գործընթացը. մայրենի լեզվով հաղորդակցվելը խստիվ արգելվում էր, նրանց թուրքական անուններ էին տրվում, թլպատում էին, կազմակերպում իսլամի և դուրանի դասեր, քարոզում թուրքական ազգայնական գաղափարներ։

Վերլուծվել է որբանոցներում իրականացվող թրքացման քաղաքականությունը, ներկայացվել կիրառվող մեթոդների հետ կապված որոշ նոր մանրամասներ։ Շրջանառության մեջ են դրվել անտիպ հուշագրություններ։

Բանալի բառեր՝ Հայոց ցեղասպանություն, թրքացման քաղաքականություն, թուրքական պետական որբանոցներ, հայ որբեր, բռնություն, անվանափոխություն, ինքնության կորուստ, հուշագրություններ։

¹⁰⁶ Akçam T., *նշվ. աշխ.*, էջ 296-304:

TURKIFICATION OF ARMENIAN CHILDREN IN THE OTTOMAN EMPIRE'S STATE ORPHANAGES (1915-1918)

Narine Margaryan

SUMMARY

The Young Turks government carried out a policy of turkification of the Armenian children also on the state level led by the official orders and telegrams. Turkish orphanages were opened in Aleppo, Antura, Beirut, Damascus, Merdin, Armash, Urfa, Diyarbakir, Malatya, Kharberd, Caesarea, and in other settlements. After collecting the Armenian children in the orphanages, a state orchestrated Turkification policy was carried out by different means, namely, it was strictly prohibited to communicate in the native language, children were given Turkish names and circumcised, they had lessons in Islam and Quran, implanted with Turkish nationalistic ideas. This article analyses turkification policy in orphanages also by presenting some new details on the methods used. Unpublished memoirs are put into circulation.

Keywords: Armenian Genocide, Turkification policy, Turkish State orphanages, Armenian orphans, violence, loss of identity, memoirs.

ОТУРЕЧИВАНИЕ АРМЯНСКИХ ДЕТЕЙ В ГОСУДАРСТВЕННЫХ ДЕТСКИХ ДОМАХ ОСМАНСКОЙ ИМПЕРИИ (1915-1918 ГГ.)

Нарине Маргарян

РЕЗЮМЕ

Правительство младотурок проводило политику отуречивания армянских детей также на государственном уровне, для чего в качестве основы служили официальные приказы и телеграммы. Турецкие детские дома были открыты в Алеппо, Антуре, Бейруте, Дамаске, Мардине, Армаше, Урфе, Диарбекире, Малатье, Харберде, Кайсери, а также в ряде других населенных пунктов.

После сбора армянских детей в детских домах проводился процесс отуречивания: общение на родном языке было строго запрещено, детям давали турецкие имена, проводили обрезание, были организованы занятия по исламу и Корану, в детях укореняли турецкие националистические идеи.

В статье проанализирована политика отуречивания в турецких детских домах, представлены некоторые новые подробности об использовавшихся методах. Введены в научный оборот ранее неопубликованные мемуары.

Ключевые слова: Геноцид армян, политика отуречивания, турецкие государственные детские дома, армянские дети-сироты, насилие, переименование, потеря идентичности, воспоминания.